

邕寧縣志卷三十六

垠西莫炳奎星五編纂

兵事志

前事七

清三 德宗下 宣統帝 附災祥

(清)三

德宗下

壬寅二十八年二月初八日。知府惠榮。焚剿伶俐墟。

先是伶俐墟。被脅從賊。賊踞焉。由是附近村落。搶劫無虛日。知府惠榮。遂率隊圍剿。禽殺數人。全墟付之一炬。賊自是失其巢穴。然民匪不分。受害者又怨兵禍之慘矣。按縣內各村。不受匪禍。則受兵禍。其被脅而從匪。原冀紓一時匪患。未幾而兵禍隨之。行旣不能。居又不可。烏乎。天方薦瘥。喪亂弘多。傷哉吾民。哀哉吾民。

四月。署左江鎮總兵馬盛治。剿洗三岸村。殺貢生滕兆熊。邊防統領馬盛治。性剛烈。然治軍嚴。果於辦賊。是年調鎮左江。賊聞之喪膽。初向義

團三岸村。與剪刀團之那平那白等村諸惡少。勾引外匪。夜間則結隊行劫。日間則散而爲民。搶掠往來貨船。及各行旅。被控有據。時匪衆兵單。未遑剿辦。匪得任其橫行。會聞馬鎮軍到任。始懼。乃詭借團練名義。擒捉外來匪徒二人送官。思假此洗脫該村匪名。又欲借擒賊有功邀賞。譎張爲幻。自謂得計。殊不知大禍卽基於此。初該匪二人。久與該村匪黨同夥。經鞫吐實。馬鎮軍大怒。籍該村匪類姓名於摺。是夜四鼓。卽督隊由水路馳剿。黎明至該村包圍。一鼓而入。盡得其主名七十餘人。驅出村前正法。其嫌疑者。械送來城。亦七八十人。時貢生滕兆熊。年老家居。以鄉里故。不忍株連多人。赴案代爲鳴冤。觸上官怒。以爲有心庇匪。罪有應得。竟一并棄市。時年已七十餘矣。六月。總兵馬盛治。被匪狙擊於隆安馬鞍山。死之。

馬盛治旣洗剿三岸村。乘勢人那白那平。直抵五塘。所過皆殘滅。旬日間殺人以千百計。人多冤之。有屠伯之稱。左江道瑞霖聞之。大不直所爲。卽率衛隊隨後。出示保民。如監軍者焉。馬鎮怒。遂憤然拔隊回署。決意不辦邕匪。次日卽督隊上隆安。至馬鞍山。分頭搜剿。時隨身衛隊。祇十餘人。經山下之馬鞍村。適著匪黃五肥、王和順、伏村內。遂爲飛礮所中。死之。迨大兵馳救。匪已遠遁。事聞。議卹。賜諡武烈。敕建專祠於南寧。

按馬鎮軍遇害。輿尸入城治喪。各界人士。皆致輓聯悼惜。無慮千計。皆悲感痛悼。令人不忍卒讀。惟惠府榮所輓。不抑不揚。意在言外。至爲得體。錄於下。(天道竟難知。我復奚言。有青史在。地方猶未靖。公誠不朽。如蒼生何。一人傳誦之。至瑞道霖。以馬鎮過於殺戮。恨之。聞其死。憤然曰。彼烏足惜。可痛哭者百姓也。乃輓

云。一天以好生之德。傷哉無辜。慘遭殺戮。予復奚言。恨爾邀功更邀爵。看五筦三江。萬顆人頭何處覓。神有報應之靈。允矣行惡必罹災凶。果然不爽。憐伊囑子又囑孫。歷九幽十獄。兩行鬼淚向誰流。一雖屬痛恨之辭。然太虐矣。或曰。此瑞道戲作也。
○又按潘守江鴻泥錄集云。此次廣西匪亂。以南甯一府推之。殺人當在百萬以上。○嗚呼慘哉。

知府惠榮。驅掠民牛歸務農局。

知府惠榮。好使酒任性。然有幹才。以廉能自負。當己亥農場被劫時。前事具即成立仁智

二營。一律嚴剿。為及早撲滅之計。惟愈剿愈起。越辛丑壬寅。徧地萑苻。應付無術。

顧賊之劫民也。以搶擄民牛為大宗。而惠守之剿賊也。以截獲賊牛為激賞。其實賊牛。即民牛也。計所截獲者不下數萬頭。不還之民。盡驅歸農場。其餘則發賣充餉。時稱為大牛販云。然銳意辦賊。匪甚畏之。

按惠守榮。以名進士。出守南甯。下車之日。察知游民日盛。調查得門頭塘官荒地頗多。乃為根本計畫。招民墾闢。立農務局。設農場於門頭塘。委員督理。認真舉辦。俟有成效。陸續推廣。常對人言。當收於十年以後。事基甫立。土匪適起。諸務遂弛。未幾去任。後人不復嗣為之。任其荒蕪。貨棄於地。游手無歸。盜源終未淨絕。俗吏營營斗筲。而於國計民生防亂止姦之道。懵然罔覺。陋哉。○又按繼惠守者為潘江。江以刑曹出守南甯。為人慈祥豈弟。判獄多主平反。嘗昭冤獄多起。若在承平時。亦一好官也。觀其大堂楹帖有云。買得我渤海牛來。凡厥庶民。何妨地僻。攜將他鬱林石去。古之廉吏。別有宦囊。意可知矣。嘗不直惠守所為。其鴻泥錄集所載曰。農

務局。在府署儀門左。門有扁額曰。南寧農務局。係前任太守某創建也。某太守性偏強嗜酒好客。橫使意氣。遇事敢爲。而喜聲譽。數年以前。某太守風聞某村有匪。輒以匪村目之。當即帶領勇丁。前往剿洗。殺人放火。不分良莠。期無噍類。並將牛隻牽回局內。聲言開辦農務。名其牛曰匪牛。旋即將牛變賣。得價不下數萬金。而劣紳奸商。從中唆擺。侵漁坐擁厚資者。不可枚舉。以故萬民衣織及牌扁等件。輒盛稱某太守德政也。由是官紳競相效尤。曾不旋踵。而粵嶠糜爛。然則廣西全省塗炭。實自某太守作俑始也。嗚呼。國家振興農業。是何如誼美恩明。如某太守者。竟至借此網民。並爲國家遺無窮之禍。至今藉藉傳聞。猶尙以幹員稱。意者今之所謂幹員。大抵如是也。某太守其一人也。農務局其一事也。廣西其一省也。宜乎時局艱難。日甚一日也云云。觀此所言。誠切中惠守之病。至謂劣紳奸商。從中唆擺。坐擁厚貲。則非事實。要之惠守功過不相掩。當分別觀之。

冬十月。廣西巡撫王之春駐節南寧。遣人招李八、唐弟投誠。時賊風日熾。官兵剿辦。久未得手。清廷鑑於洪楊已起事。方以爲憂。乃命知兵大員王之春。巡撫廣西。督辦軍務。是月抵南寧。當之春未至時。聲威震動。賊聞之甚懼。以爲大兵一至。決無留種。以故預爲引匿。一時劫案稍稀。及是一籌莫展。復深閉固拒。官民隔閡。更甚於前。地方大失所望。由是賊燄復張。搶掠之案。漸及城下。之春不得已。遣人往招李八唐弟投誠。二人遂率黨百餘。携械入城。陽爲就撫。遂編其黨爲啓新營。其實二人無投誠意。不過以之春黔驢可欺。思借官兵以逞其欲。之春亦欲假招撫之名。粉飾奏報塞責。是後兵賊通同一氣。狼狽相倚。地方愈糜爛不堪。

按李六生籌廣西篇云。戊戌年。黃槐森巡撫廣西時。李立廷倡亂鬱林。連陷三城。頃之卒爲官軍收復。而不聞所以善其後。徒斤斤焉與蘇元春磋商於保案。坐令地方凋弊。匪勢蔓延。推原禍始。黃槐森實不能辭其咎。繼王而起者爲丁振鐸。是時劫奪之案。層見疊出。官吏以司空見慣而聽之。賊匪以無所忌憚而爲之。廣西之亂。至是已不可收拾。丁又不久於其任。適王之春開去皖撫缺。在京極力運動。政府無可位置。遂以老軍務薦於朝。丁既升任雲貴。王因是得授廣西巡撫。夫政府諸公。非真知桂匪之足憂也。直欲爲王安插耳。王之春非真有定亂之才也。直以開缺不甘。斡旋一缺。以炫其手段也。觀其至梧州時。有諛之以詩。中有指日太平之句。王曰。業已太平矣。無待指日也。烏乎。王之春目中無廣西之賊。以爲不足辦者。非驕也。其實闇於方略。庸懦無才也。於是廣西之賊。亦至是而愈張矣。

左江道瑞霖。撫賊歸民。

時縣東北一路。爲盜賊窟穴。經惠府榮。馬鎮盛治勦洗。殺戮不計其數。而賊不稍減。瑞道惻然傷之。乃使人招撫得數百人使之回村。然無法以善其後。此輩威既不足畏。恩又不知懷。且報復相尋。時事愈壞矣。

左江道瑞霖。誤剿劉霄村。

心墟鄉劉霄村。素不附匪。知府惠榮。嘗給發槍枝。回村守禦。屢與賊爲難。爲賊所仇視。時賊黨方就瑞道招撫。謀陷之。一日捏報該村駐匪。請發兵速剿。毋令兔脫。偵緝未易也。時瑞道與惠府不協。又未詢問團局。方謂兵貴神速。且自詡勦撫兼施。以誇其能。遽聽一面之辭。貿然發兵圍剿。時已黃昏。該村以爲匪之來劫。悉力抵抗。官兵信

以爲賊之拒捕。乘夜猛攻。平旦破之。殺百餘人。方知其誤。已無及矣。

按辦理邕匪各軍官。總兵馬盛治。與惠守榮。則一意主剿。巡撫王之春。與瑞道霖。則一意主撫。主旨不同。遂成意見。時縣東北區各匪。方就瑞道招撫。而密稟劉霄爲匪邨者。卽此就撫之賊。瑞道不察。遽信就撫者皆良民。而以劉霄爲匪村。未免爲賊所愚弄。厥後余道繼任。盡將此就撫者駢戮之。人稱快焉。

詔兩廣總督岑春煊。督辦廣西軍務。并令覆奏辦理情形。

廣西匪亂連年。官軍勦辦無效。巡撫王之春既辜委任。柯逢時繼之。而匪勢愈熾。乃命四川總督岑春煊。爲兩廣總督。督辦廣西軍務。春煊以爲廣西亂源。咎在官吏。非正本清源。未易清理。於是提督蘇元春。巡撫王之春。先後參劾落職。道府以下。參革撤任過半。時謂之勦官。先是駐藏大臣桂霖。奏廣西游匪。隱患日深一摺。上諭着岑春煊將所陳各節。體察情形。奏明辦理。至是覆奏云。臣當將桂霖原奏。詳加披讀。如所稱粵省群匪。羽翼日廣。有會而匪者。有兵而匪者。有民而匪者。有官而匪者。滇黔接壤各處。幾於無地不匪。無人不匪。曠日持久。兵餉兩絀。將有防剿俱窮之勢。國家無咸豐同治間財力。亦無咸豐同治間人才。此匪若再潰裂四出。天下事尙可問耶。各節。語語真情。字字可痛。其尤要者。以與諸將更始。與牧令更始兩語。爲目前下手之端。惟是禍患之來。匪伊朝夕。推厥原始。由於營伍廢弛者半。由於吏治廢弛者半。營伍之咎。實蘇元春一人尸之。臣於查覆蘇元春被參摺內。業已詳陳。吏治之咎。實前撫臣黃槐森尸之。而王之春亦不得分任之。溯查黃槐森在任之時。吏事毫不講求。用人惟憑賄賂。當乘輿出幸西安之日。海內驚動。黃槐森尙置酒演劇。荒樂如常。此而不知。更知何

事。由是牧令中之賢者。相率引去。留者強半不肖。以不肖牧令。而膺民社。小民遂不堪命矣。黃槐森又好言祥瑞。惡聞盜賊。州縣望風承意。相率諱盜。凡遇民間報劫案。或獲盜送官者。必任吏役勒索規費。種種刁難。始肯收稟。及票差後。又縱其肆行騷擾。搜括無遺。賊未懲辦。事主已先破家。於是民皆相戒。良善皆受匪害。不敢控官。狡黠者乃與匪通。且求自保。遂釀此徧地皆匪之現象。逮王之春到任。不知認真整飭吏治。以清匪源。一意主撫。但圖欺罔。所任各守令。聞虐民而不聞保民。小民先被災荒。續遭匪患。固已極矣。各守令尙有藉辦團爲名。抽收團穀。較正賦多至數倍者。抽收擔竈捐。盈千累萬。盡入私囊者。吏治若此。就使無蘇元春之養匪庇匪。民已將激而生變。況有蘇軍壁壘。爲匪之巢穴。蘇軍槍彈。爲匪之軍儲乎。現在匪患日深。除桂平梧屬之外。幾於無地不匪。若不亟亟蕩平。誠如桂霖原奏所云。曠日持久。兵餉兩絀。將有防勦俱窮之時。而熟察匪勢匪情。則又兵來則民。兵去仍匪。兵已疲於奔命。匪轉以逸待勞。此民匪不分。其難一。槍枝彈藥。可售諸匪。而得財。子女玉帛。可藉助匪而肆掠。兵與匪狎。兩利俱存。雖號稱數十營。實不得一兵之用。此兵匪不分。其難二。匪所窟穴。必在深山箐密林深。路尤險絕。匪之習慣。捷如猿猴。客軍初來。拙如牛豕。且方夏時。草木掩翳。匪得所蔽。反乘官軍。此匪巢險固。其難三。疊嶂橫盤。動輒百里。路徑叢雜。不易合圍。此方進攻。彼已旋遁。此山路紛歧。其難四。有此四難。若專以防勦委諸兵。無論各營不盡足恃。即足恃。亦必不敷。爲今之圖。惟有一面趕辦賑糶。俾飢民不至脅從。一面委知兵愛民之牧令。分任有匪州縣。認真舉辦團練。分別民匪。俾閭閻多一良民。即地方少一匪黨。並准有匪各州縣。招募壯丁。由公欵動支餉項。

。督同團練。任防堵之責。堅壁清野。俾匪出無所掠。復整頓水師。督飭各路關卡。認真巡緝。斷匪接濟之路。專以往來截勦夾擊之事。責諸各軍。先清出外搶掠各匪。俟秋高木落。縱火焚山。以覆匪巢。現分柳州慶遠爲一路。思恩南甯爲一路。泗城百色爲一路。龍州及沿邊爲一路。各派營旗。專任勦辦。就目前情形而論。則以柳慶思南兩路匪氛最盛。其餘兩路次之。日來東蘭吾隘懷遠銀。相繼收復。各路亦時報斬獲。軍務似稍得機。然州縣若不得人。縱使各匪暫懾兵威。仍不敢存實在肅清之望也。伏念匪之起也。非天特生一種爲匪之人也。民不安其生。舉全省之民。皆可化而爲匪。匪之平也。不能悉舉。凡爲匪者。盡坑之也。匪有業可執。全省之匪。皆可化而爲民。民匪消長之樞機。實視吏治爲進退。廣西之亂。既由吏治敗壞而生。則廣西之治。必賴吏治澄清始。方擬懇天恩。明降諭旨。嚴戒廣西官吏。嗣後如仍有罔恤民瘼貪婪殘酷者。卽行嚴辦。綸音一布。則中材而下。皆可免爲循良。不待微臣執法相繩。而粵亂亦將有彳矣云云。時叛匪陸阿發踞柳慶。五十二峒。勢尤猖獗。乃先馳赴右江督勦。而左江一帶。及思恩鎮色各路。奏委余誠格辦理防務。一時兵氣維揚。賊徒震懼。大局從此轉機。

參光緒政要

殺雷八於龍州。

雷八。東門鄉津頭村人。素無藉。少時隨李揚才入安南。揚才敗。結黨入山。法越之變。歸提督馮子材收編。守長牆。親與法人搏戰。最奮勇。大爲子材激賞。以和議撤兵。未邀保獎。仍率黨上山落草。出沒於光宣一帶。法人不勝其擾。後就提督蘇元春招撫。以無相當位置。久之叛去。竄泗鎮邊遠各地。事事打劫。實爲廣西肇亂之原。二十七年

。左江道瑞霖。使其黨高某。先受撫者。說之投誠。雷八允之。遂率黨百餘人。至南寧。編其黨爲雁字軍。委雷八爲管帶。未幾瑞霖去任。何昭然繼之。旋調安邊道。雷八因護何道開往龍州。當是時雁字軍爲正老綠林。異常精悍。然不甚受約束。爲岑督偵探員查悉。密電岑督。謂雷八態度不明。宜速除之。岑督卽密電某帥主其事。某帥預伏兵於壁。著雷八赴較場點名。繳去舊槍。著到軍械局另給新槍。故迂其途。又令魚貫而行。以免擁擠。至則潛殺之。前後不相聞。百餘人無一脫者。高某亦同日被僇於南甯。

卯 癸 二十九年正月。鎮道合勦東路土寇不克。

歲抄。賊在九塘一帶度歲。左江鎮道潘瀛、何昭然、以賊聚一隅。可一鼓殲之。正月八日。督安勇虎勇威字等營。馳赴東路合勦。賊覺先遁。僅於那農那里那昔各村。搜殺從賊十餘人。未幾張特盛羅四等股。劫巡船於牛灣。戕殺委員。二月。覃子珍等股伏七塘驛。截殺鎮南營管帶何某。又劫虎勇餉械。虎勇小隊覆焉。二十四日。羣賊襲八塘舊地村。團練擊走之。

三月。綏遠軍破賊於三岑山。縣東羣賊皆降。

上年安勇虎勇。自粵調防。征勦數月。皆無功。至是大府又奏調督辦欽廉邊防。卽補道潘培楷。來邕督勦。二月二十八日。培楷統綏遠四營二千人。至自欽州。以東路爲羣賊窟穴。屯聚連年。道途梗塞。非先清此一路。不足傾其本根。於是扼伶俐長塘砧板剪刀各處。防偷渡。檄虎勇入武緣。分布葛墟林墟米花平一帶。遏其北竄。而令營務處知府李宗道。駐五塘。爲中路策應。並檄八九塘團練搜勦。三月二十一日。始遇賊宣武境上

之三岑山。適大霧。不辨咫尺。兵練先已據險。午後霧霽。而賊已陷伏中。冒死突出。兵練奮擊。大破之。斬十餘級。擒悍賊滕繼升。越日追敗之四塘蘇村。二十四日。滕止宜一股。竄回郭湓村。村人閉閘不納。一面飛報官軍。綏遠軍管帶黃秀瑀。時駐沙平墟。聞報馳至。追擊賊於湓塘村。又斃賊十餘。擒獲朱阿吉。及阿爪六二名。是時米斤百錢。賊數日不得食。兵練追躡急。野無可掠。皆散匿各村。陷賊之村。知官軍足倚。皆密謀反正。連日縛江雲祥、李特正、李特明等九名。快槍九枝。宗道但釋繼升雲祥特正三名毋誅。以招賊。餘戮於市。四月十五日。雲祥招其匪目覃子珍、張特盛、覃阿賢、陸立宜、蒙阿大、陳耀明、陸四年、滕舉明、滕大脚二等股。二百餘人。於五塘繳械投誠。惟王和順、滕正宜不至。左江道余誠格。使雲祥統其黨。許以立功贖罪。詎賊黨不聽約束。復通賊如故。七月。誠格乃設法調往隆安。以計誅之。無一漏網。自是賊燄稍衰。七月。李八、唐弟、伏誅。

上年。李八唐弟投誠。編其黨爲啟新營。原冀其立功贖罪。從優錄用。乃狼子野心。賊性未改。暗地濟匪。復漏洩軍情。使匪預匿。以故官軍勦賊無功。余道誠格。屢欲除之。未得其便。時武緣匪氛甚熾。乃令唐弟留城。使李八盡率其黨。從官軍出勦。未幾。官軍從武緣拔隊回五塘。頃之又引回四塘。以計令李八後至。官軍槍皆實彈以待。故留一坡受敵地址。李八後至駐焉。時方盛暑。賊方解甲休息。俄而號砲一聲。官軍四面注槍叢擊。賊驚措不及。全營俱沒。時七月十四日也。是夜唐弟亦被誅於城。

十月。前雲南提督馮子材卒於軍。時軍隊大集。多屬客軍。水土不服。地理不諳。且兵去賊來。兵來賊去。官軍疲於奔命。

。無異以牛搏鼠。勦辦無功。於是地方人士集議。非得一最有威望大中。爲地方信服者。出任其事。決難了局。前雲南提督馮子材。素爲桂人所嚮。時方致仕家居。乃據情請願粵督。乞再出山。辦理防務。粵督岑春煊准從民意。遂奏調來邕。子材遂集舊部。尅日成軍。是年六月到邕。地方士庶。歡迎十里外。匪首王和順。亦有投誠意。子材時年近九旬。以軍務焦勞搆疾。十月遂卒於廣東會館。大功未竟。將星遽殞。人皆惜之。事聞議卹。賜諡勇毅。

論曰。馮勇毅公二次出關。四駐三甯。連年暴師。冒鋒鏑。犯瘴癘。勞苦至矣。卒能師出以律。馬到成功。勦業在人。於今爲烈。在昔伏波將軍。平定交趾。嶠南七州。得免夷患。民受其賜。廟食到今。馮公此次出師。雖未能迅奏膚功。然軍威所播。賊氣潛消。較之馬將軍壺頭之役。實勝之。於戲。諒爲烈士。何減暮年。馬革裹尸。古今人正復相似耳。

十二月。官軍誤剿立盧村。

潭落鄉立盧村。素與賊作對。賊恨之。顧以該村頗多打手。寨柵堅固。無可奈何。會貴字營張管帶。率隊經過該村時。兵匪不分。有匪而假兵者。有兵而爲匪者。村民登時閉閘。以俟動靖。適有招安匪爲勇者。在柵外故意舉槍示威。村民以爲真匪。即時施砲。擊斃勇丁數名。該管帶以爲匪村拒捕。督隊四面包圍。互擊一晝夜。柵堅不能下。鄰團聞警。爭來援助。既而知彼此誤會。一面稟報來城。一面止該村停砲。殊張管帶以斃勇多名。憤甚。乘守閘懈弛。撲入。殺斃村民男婦一百五名。遂馘耳以殺賊報功。余道遣人止之。村已破矣。委驗得實。給撫卹金二百圓。辦什長一名了事。

甲辰三十年二月。韋五嫂伏誅。

韋五嫂。隆安那桐芳村人。逸其夫名。體強壯。貌豐偉。如美男子。性不羈。夫饒於財。歿後。五嫂承其家貲。益淫侈自放。先是其夫恆與諸惡少來往。以故無藉者。緣此恒出入其家。未幾以窩賊聞於官。遂下令拘捕。五嫂卷其重貲遁於山。既而憤曰。與其死於官。寧死於賊。遂集衆告曰。爾輩累我。將奈何。衆曰。唯有反耳。五嫂大喜。即出貲購械。從者數百人。由是打單劫舍。抗拒官軍。與閉運培、王和順等合夥。縣西數十團。及宣隆交界村鄉。皆被蹂躪。是年正月。與官軍遇於隴墟之獨山。敗竄那龍。黨羽皆散。五嫂窮蹙。匿於相識某團紳家。團紳涎其色。納爲妾。官軍偵知之。拿獲。並團紳同棄市。

左江道余誠格。督諸軍勦平各匪。地方肅清。

上年粵督岑春煊。既馳赴柳慶一路督剿。乃奏委余道辦理左江防務。以一事權。初賊之起。由於官軍不明賊情。是以任賊到處裹脅。蔓延全省。且此拿彼竄。官軍疲於奔命。匪反得任其逍遙。余道深知其弊。於是聯絡鄉團。赦以前裹脅之罪。嚴此後通賊之誅。堅壁清野。嚴行堵剿。以大隊從紅水江上游。兜勦匪巢。令諸軍分駐思恩武緣上林泗色隆安各屬要隘。而邕江上下游。復徧布游擊隊。互爲策應。又以軍法勒各渡民船漁艇。十日內不得灣泊北岸。預先斷賊奔竄之路。又置傳遞所。令各鄉團於賊匪經過之處。飛報官軍。協同截剿。於是消息靈通。賊入山既失巢穴。入村又爲團練所擊。掠食無所。勢已窮蹙。思南竄十萬山。而欲渡無船。追兵又至。相率奔潰。先後降斬殆盡。而黃五肥、滕正宜、閉運培等各首匪。均次第授首。無一漏網。惟王和順逸去。積年要匪。至

是蕩平。地方肅清。

兩廣總督岑春煊。廣西巡撫柯逢時。會奏剿辦左江匪摺云。竊廣西剿匪情形。經臣電奏摺奏在案。本年入春以來。餘匪麇集思恩一府。旋又竄擾左江各屬。先是本年正月二十六日。匪首王和順等。圍攻武緣縣之賴村。及花園村等處。經左江道余誠格。深悉。當商署左江鎮丁槐。派衡軍管帶黃朝殷。及陳世華。率營往剿。大敗股匪於隴陌隴浪。黃朝殷力戰受傷。入夜遂斃命。二月初六日。該匪竄回隴村。親軍管帶覃國慶。率所部八十人。及常備軍右營一哨。前往掩襲。甫至螃夾嶺。即遇伏匪。我軍登山俯擊。閱兩時之久。檜傷悍匪三十餘人。斃匪首曾啟初。陸四年。及匪黨七名。餘匪紛逃入隴。旋聞王和順、黃五肥。兩匪首。在武緣隴烈地方。與游匪首鄭五。雲南匪首黃三。黃八。及周特先、滕正宜、鍾大、那渣四、蒙特七、陳二等股匪合幫。分紮喬建隴洞各處。約三千人。十九日。覃國慶。仍同常備右營一哨。由杜村會合署思恩府知府傅吧孫。及貴字後營鄧鵬程、譚炳榮。趕至助攻。自午至夜。未得收隊。匪力不支。越山逃遁。二十日。追至局理。匪分爲二。黃三、滕正宜、周特先、蒙特七、陸彩邦、黃二等股匪千餘人。竄都吉。是日鄧鵬程。追至都吉。譚炳榮率隊直抵柵門。與匪爭踞附闌小廟。揭瓦鑿檐安砲俯攻。匪衆死拒。自辰至酉。斃匪無算。夜深。匪燒屋焚尸。破牆潰出。追斬首級十三顆。擒獲匪三名。匪婦二十一口。馬三匹。僞旗四面。槍四枝。匪潰後。四散入隴。探知漸集於武緣橄欖村。二十三日。傅紀孫。率綏遠正中營。由那莊進勦。斃匪目王大化。匪首陸彩邦。綏遠左營管帶張耀山。聞信趕至。匪又乘夜竄出。經邕防親兵營管帶任定元。及衡軍。並葛墟團勇。截擊。斃

匪目黃權昆。時綏遠軍統領和廷標。亦至米花坪。遂督同張耀山。任定元。並綏遠後營管帶葉春。衡字親軍隊弁杜育。冒雨跟追。至宣化之大鄧村接仗。越十餘高嶺。由下仰攻。斃匪落巖澗叢箐中者無算。斬雲南長髮匪首黃三。獲其妻楊氏。及滕正宜之弟滕成慶。高州匪目黃平忠。杜育又擒獲滕正宜之妻及子。並匪目何恆松。任定元擒匪首黃二。代理金城巡檢林桐。督同五塘團練。擒匪首蒙特七。斃悍匪蒙特二。南鄉團練。擒匪目黃日濟。德馨團練。擒欽州匪首劉十二。榨油練丁。擒永淳總目屈四。均經訊明。就地正法。餘匪散竄。富飭營團。嚴行搜捕。此剿辦由局理分竄都吉各股匪之情形也。其黃五肥、王和順、潘二、黃八、陳二、梁三等股。亦約千餘人。由局理隴中竄隆安。二十二日。經綏遠右營幫帶劉坤隆。截擊於梅圭。自辰至戌。斃乘轎匪首一人。斬首級八顆。擒生供一名。夜半。匪竄合羅村。適熙字後營亦到。同追至合羅。匪竄永康。經永康州知州沈士彥擊退。匪竄羅陽入隴。熙軍以不見匪回武緣。劉昆隆亦回隆安。卅日。陳世華電稱匪匿伏廖。初一日。丁槐飭和廷彪。由永康進。陳世華由太平進。自率所部由新寧進。水師統領余炳忠。督水師。收渡船漁艇。闌禁三江口一帶。以防回竄。旋探得匪踞屯村隴鞏岬炭瀨各隘。周遭百餘里。林木茂密。巖石巉削。仰不見日。俯無容足。丁槐部署八面環攻。匪衆踞巖履石。竭力死拒。和廷彪、陳世華、身先士卒。於槍林雨彈中。督隊鏖戰。歷初三初四兩晝夜。連砲要隘數重。陣斬悍匪六十人。生擒匪首黃八、潘二、梁三、及匪首二十名。均經丁槐訊明。軍前正法。槍斃匪黨墮落巖澗死者無數。起出被掠婦女三十餘口。黃五肥乘夜緣藤墮巖而逸。初四夜。潛行至永康西門嶺外。適值沈仕彥所派之親兵哨長武生馬榮輝。

文童沈浩文。共帶親兵二十五名。埋伏要路。時已四更。伏兵聞有人聲。似非行旅。遂開槍迎擊。夜氣昏黑。初不知槍斃爲誰匪。亦不知匪黨多少。但回奔山麓。親兵等亦尋聲跟追。天明搜獲匪婦盧黃氏、胡黃氏、女童羅亞月。詢知夜來所斃各匪。黃五肥卽在其中。隨報知沈士彥。出城驗視屬實。遂割取首級。并搜出買物信單二紙。一併解送南寧。經臣飭將黃五肥首級。傳示南寧隆安一帶。以寒匪膽。其餘散匪。仍由各文武分投搜捕。此剿辦局理分竄隆安永康各股匪之情形也。以上各情形。自本年正月。起。至三月初六日止。據署左江鎮丁槐。左江營務處署左江道余誠格。候選道劉永滇。及各該文武。先後電報稟報前來。臣查黃五肥。與李八、唐弟、羅萬起等。倡亂宜化。裹脅之衆。幾至徧地。屠戮之慘。動輒全村。擄掠之多。不能計數。肆毒於左右江上下。稔惡將近十年。前柳慶鎮總兵馬盛治之陣亡。卽黃五肥之所爲。今李八、唐弟、羅萬起。經臣先後飭拿正法。該匪亦窮困授首。實足以中國法而快人心。其黃三、陸四年、黃權昆、王大化、劉十二、黃二、滕成慶。黃平忠、何恆忠、黃日濟、屈四、蒙特三、曾啓初、蒙特七、陸彩邦、黃八、陳二、潘二、梁二等匪。亦皆係著名首要。仰托朝廷威福。數月之內。以次翦除。

論曰。兵者毒天下之具。聖人不得已而後用。故曰佳兵不祥。然在詩曰。未雨綢繆。書曰。克詰爾戎兵。司馬法曰。國家雖安。忘戰必危。若是者何也。蓋兵可百年不用。不可一日不備。備而不用。唯智者能之。故曰。有備無患。我縣在昔爲荒徼地。無兵事可言。自唐設嶺南五筦。而邕州始稱重鎮。遂爲兵衝。自是以來。邊寇竊起。土寇滋亂。據地憑城。殺戮屠洗。歷世不絕。考之前事。其最著者。在唐則有黃峒之亂。繼以南詔。宋則有儂氏之亂。繼

以交趾。又益以蒙古。夫黃峒南詔。亂之最久者也。儂氏、交趾、蒙古。亂之最大者也。久則苦累吾民。大則危及全國。觀歷史所載。與故老傳說。黃峒南詔之亂。相繼白餘年。交趾之亂。屠戮刼擄我人民二十萬。至今猶爲心悸。然尙祇在一隅。至儂氏智高。蓄亂廣源。已非一日。一旦破橫山。據邕郡。乘流東下。不旬日而直達番禺。使其計得逞。則渡嶺而入贛。分兵而入閩。中原南部危矣。蒙古潛師走安南。出橫山。闢老蒼關。掠靜江府。以抵潭州。扼宋人之吭而拊其背。宋室遂亡。若是者何也。蓋兵事與地理相關係。邕內縮兩江。外控交夷。上通滇黔。下達梧粵。北走柳桂。位置鬱江上游。爲中國西南屏蔽。敵人據之。破藩籬而入堂奧。雖有智勇。猝不及施。故儂氏揚帆而東。沿江九郡縣失其城守。烏蘭哈達掠地而北。宋兵四十餘萬。束手就縛。使當日重兵屯邕。何遽潰決至此。吁。前事不忘。後事之師。則今日之治邕。又當何如也。或曰。吾國自有歷史以來。治亂循環。但禍變之來。古今殊勢。在昔刀矛劍戟。雲梯衝車。其爲殺人攻城利器止此耳。今者海陸空軍。毒烟炸彈。潛艇坦克。種種新發明。剎那間城郭立成齏粉。人民盡化蟲沙。其戰術之精巧。轟炸之猛烈。造化不能窮其變。鬼神不能測其機。將以何術免之。予曰。唯唯否否不然。夫槍砲者有形之武備也。仁義者無形之戰器也。有形者備而不用。前已言之矣。然則治邕於今日。宜鞏固邊防。力圖內治。毋挑怒強鄰。毋斂怨百姓。使外寇不起。內亂不生。更慎選良吏。興謀教養。安民和衆。通商惠工。斯則長治久安之要政矣。

宣統帝

己酉 元年提督龍濟光。招募散勇屯田。

距縣南八十里棉羊地。東西寬十三里。南北長十八里。悉屬官荒。時初廢綠營。改練新軍。汰出勇丁。無從安插。龍濟光乃招集官本數萬元。設濟福公司。建築房舍。購買農器。招募散勇。充作墾丁。以十人爲一棚。立一棚長。十棚立一墾長。分段開墾。照招商開墾章程辦理。十年後一律升科。並考照新法開築塘壩。以興水利。考查土性。廣植穀種。兼營森林畜牧。以拓農業。頗著成效。南寧逼近越邊。棉羊爲邕欽通道。地本荒曠。行旅戒途。自經創辦墾務。設立屯兵。荒瘠既轉爲膏腴。商民亦重資保衛。三年三月。廣東事起。三月廿九日革黨黃興等攻督署死者七十二人調發南甯防軍赴援。至八營之多。招募應時立集。未至貽誤事機。實由該公司墾丁。多係被裁營勇。故能倉卒成軍。平時既能闢荒以興地利。有事又能養兵以備非常。頗得古昔寓兵於農之意。節公牘

案棉羊在縣南八十里。向曾有村落居住。疊經兵匪蹂躪。鄉民逃亡殆盡。自龍濟光招募散勇開墾後。村民漸次來歸。復成村落。若地方無事。生聚蕃息。二十年後。則富庶可期也。

辛亥三年八月。王和順入粵起民軍。攻惠州城破之。遂入廣州。旋與陳炯明爭粵督。大戰廣州城。

王和順東門鄉那造村人。素無賴。與李八充當縣署衙役。當光緒甲申乙酉間。城外草坪。咸同間。城外市廛。迭遭兵燹。自木行街外。皆成荒地。故名之。攤館林立。地爲下流社會所麇集。鬥殺搶掠偷盜。時有所聞。時邑侯蕭憲章蒞任。察視該地遼濶。巡邏難週。卽於該處立捕盜營一所。撥衙役健

卒十餘人。常川駐紮。以資警察。和順李八與焉。宵小稍爲斂迹。殊日久弊生。反與匪徒勾結。狼狽爲奸。借名捕盜。其實爲盜。且任意橫霸。無惡不作。屢被告發。若輩自知稔惡。不容於衆。因更廣結黨徒。氣勢愈橫。往往睚眦殺人。無敢忤者。官府雖知其弊。恐滋激變。不欲過爲操切。由是隱忍養癰。十餘年。戊戌秋。巡撫黃槐森巡邊至邕。閱地方呈辭。洞悉其奸。卽委幹員沈世培。權署縣篆。屬令除之。世培卽以計禽之。

十餘人無一免者。

世培先一日牌示。至該營點卯。因考察該役能否服務。並點驗槍枝。如有銹澀不磨擦者。撤差等語。和順等聞之。把槍枝磨好。屆時呈驗。盼望嘉獎。世培既收其槍枝。卽喝令

禽下。初欲擬以大辟。旣而赦之。時遊匪已潛布內地。和順李八二人。乘此時機。甫出獄。

卽糾集匪徒。聚衆拜台。是爲邕地會黨倡亂之始。時二十五年己亥八月也。當是時匪首無慮數十起。糾結不過數十百人而止。惟和順聚黨嘗千數百人。火器精利。出沒於泗鎮柳慶思南一帶。下與欽廉諸匪相流通。此拿彼竄。飄忽無常。殺人火村。視爲常事。大爲地方害者六七年。及余誠格觀察左江。辦理防務。行堵剿之法。賊計窮蹙。諸匪日均先後降殺殆盡。惟和順亡命出關。走南洋。始聞民族革命之說而悅之。遂入同盟會。三十三年丁未。會廣東欽州三那地方。因苛稅激變。乃隨黃興入欽廉。運動會匪起事。旋陷防城。殺知縣。復折入越南。攻鎮南關。以圖廣西。不克。遂入雲南河口。攻蒙自開化蠻耗等處。尋爲官軍擊散。乃逃日本。八月革命軍舉義武昌。黃興入長江。和順入廣東。率民軍攻惠州。時因種族排滿。西南各省。皆倡言獨立。全國應之。兩廣總督張鳴岐。棄城而逃。和順遂入廣州。編其衆爲十三營。推爲民軍統領。明年壬子二月。與陳炯明爭粵督。大戰廣州城。三日。死傷山積。旋爲陳炯明所敗。走香港。

九月。廣西軍民宣佈獨立響應革命軍始推巡撫沈秉堃爲都督。旋改推提督陸榮廷爲都督。設軍政府於南寧。

時清政不綱。外交失敗。革命之說。已漸漬於人心。自鎮南關與雲南河口之役失敗後。黨人益憤進行益急浸假。而有三月廿九日突攻廣州督署之變。尋亦失敗。死者七十二人。餘黨散走海外。會七月。川省路事激變。川民暴動。政府命兩湖總督端方。率鄂軍入川查辦。湖北省城空虛。黨人以時機可乘。急謀歸國。八月十九夜。遂起事於武昌。逼脅第二十一混成協協統黎元洪爲都督。通電全國。取一致行動。各省民軍皆起應之。廣西亦以九月十七辛巳。宣布獨立。推巡撫沈秉堃爲都督。越乙酉。桂林兵變。秉堃捲庫款而逃。乃改舉提督陸榮廷爲都督。設軍政府於南寧。初民黨鑑於廣州督署之敗。乃潛派黨人歸國。運動軍隊。廣西分設桂梧柳邕四部。爲辦事機關。邕以雷在漢爲部長。在漢東門鄉津頭村人。素講民族主義。蓄志革命。後得其從弟沛鴻介紹入同盟會。因與黨人往來。革命益熱。時陸軍標營。經黨人運動。其隊長王兆鑾譚昌等。皆已入會。時常秘密會議。許以有機可乘。卽謀響應。會八月武漢事起。民黨周毅軍^{雲南}李應元等。咸躍躍欲動。又接桂梧柳各部密電。令先在邕起事。方好着手進行。於是暗布傳單。集黨會商。主張急進。欲圖破壞。在漢以邕人。恐事決裂。大小謂然。又因餉械運送未至。議故未決。忽桂垣獨立公電至。時夜將二鼓。全城鬩動。人心搖惑。民軍土匪。將乘機爲變。各界人士。咸慄慄自危。次日。大會於自治籌辦所。進謁提督陸榮廷。請急照省電施行。維持時局。免激烈派得以藉口。則前途自可從容布置。大局自可無虞。陸允之。越日癸未。遂於北較場當大衆宣布獨立。通電國內。附和共和。當是時人心思亂。驟聞改

革。而能貼然安堵。市肆不驚。殆由陸榮廷能順時勢潮流。及地方各團體相與維持之力也。乃周毅軍等。以此事籌備半年。一旦功歸他人。殊快快。是日與其黨謀。潛約新軍。乘夜入城。據軍械局爲變。將謀不利於龍觀光。觀光固新軍標統。與陸有連。偵知其謀。告之。下午四時。陸公即發兵包圍新軍。勒令繳械。新軍被逼從之。奸入因是志不得逞。當調兵出城時。訛言繁興。人心驚惶。市戶皆閉。至是事定。人心乃安。陸雖知爲黨人所爲。然時正利用黨人。不能不虛與周旋。概勿深究。祇將隊長譚昌囚之獄。擬欲懲一以儆其餘。既而因黨人緩頰。赦之。旋接藩司王芝祥電。催陸赴桂垣。蓋前此巡撫沈秉堃爲都督。非得桂人同意。而潯柳各民黨。方組織同盟會。欲謀澈底改革。會桂林駐軍譚變。秉堃借故北歸。時王芝祥代理都督。又屢被各府縣人士馳電攻擊。心殊不安。以故電陸赴桂。接受都督。時郡人已推陸爲副都督。南寧已設立軍政府。辦理一切善後事宜。凡徵集綠林。解散民軍諸要務。方着手進行。而王電適至。還未即赴。嗣因各府縣函電敦促。陸乃首途。軍政府事務。委其統領譚浩明代拆代行。至是陸乃正式受任爲廣西都督。而各地民軍。欲再圖舉事。而苦無名義。皆戢然不敢動。至是而全省大定。逾壬子。遷省事起。臨時省議會。成立於南甯。既而周毅軍等以前志未遂。乃倡言廣西爲僞獨立。召集賓州土匪廿六藍八等。圖爲二次革命。時陸方在桂垣。急電購緝獲之。與李應元等。并戮於市。

按黨人利用武人。推倒滿清。自謂成功。其實武人利川黨人。以濟其私耳。而黨人不悟。厥後猶襲用此策。用武人以推倒武人。詎知一軍闕去。一軍闕來。結果終以武人佔其利。自國變十餘年來。紛紛擾擾。陷吾民於水深火熱中者。黨人爲之也。嗚呼武人。嗚呼黨人。

民國

壬子元年春。廣西省會。自桂林遷邕。組織成立臨時省議會。

辛酉十年。粵督陳炯明侵廣西。七月陷邕城。桂督陸榮廷通電下野。

按陸榮廷。治桂十年。一切毫無建設。自難免世人責備。然此十年中。國內各省。無不陷於擾亂糾紛。人民塗炭。幾無甯歲。獨吾省少事。事實俱在。當為衆所公認。自此下野後。吾省多事矣。如十二三年。自治軍之縱兵擾民。十四年。春。滇軍來侵入據南甯。十八年。俞作柏主政。與共產黨聯合。屢召禍亂。十九年。夏間。滇粵軍圍攻南甯。以飛機炸彈。焚毀民居。殘害民命最為慘虐。且圍城至百日以外。致使我守城將士。餐及黑豆。幸仗人無叛志。危城獲安。令所傳為黑豆節紀念者是也。計當日敵人前後拋擲猛烈炸彈之數。可得而紀者如下。北門正街炸一只死傷百餘人。北較場炸一只死一人。興寧路炸一只死三十餘人傷二十餘人。財政廳前民房炸一只死十二人。桃源路炸一只傷死七十二人。水閘門內炸一只塌屋一間。又水閘門口炸一只死二人。高等法院前炸一只傷一人。觀音閣炸一只焚屋二間死二人。鹽埠街炸一只倒屋一間死一人。鐘樓脚炸一只倒屋二間。六公祠炸一只入水池內。馬草街炸一只。安塞門正街炸一只。橫街炸一只。民生路炸一只。舊巒宮炸一只。總司令部署前炸一只。三元閣馬路炸一只。第四小學校炸一只。火燒地炸一只。銀獅巷炸一只。省政府炸一只。商會操場炸一只。牛角灣炸一只。軍裝局炸一只入塘內。以上傷死人數未詳當被炸時。尸肉飛颺。其臟腑掛於屋簷電線上。纍纍如貫珠。至為慘傷。

附災祥

（唐）

憲宗元和十三年。有里嶸見邕州。鼓江流。壞北岸。覆舟害人。久乃去。案粵西叢載作會昌間誤。今據柳河東集改正。

（五代）南漢

乾和二年。邕州鳳凰見。時鎮王洪澤居邕州。有善政。晟怒。使人鳩之。歐史南漢世家南漢時。邕州有大鳳凰。高五尺。金冠五彩。飛入城中。衆鳥朝之。文若布錦。其鳴節節足足。赤雅

（宋）

太宗至道二年閏七月。廣南諸州並大水。李通志

真宗咸平元年十二月。宣化縣保聖山。瑞竹一本二枝。宋五行志

二年。廣南西路旱。李通志

四年。邕州澄海軍卒梁濟妻產三男。宋五行志

大中祥符四年八月。邕州雲封寺柏樹生芝五本。知州劉知誥以獻。宋五行志

六年。邕州麥秀兩歧。或三穗。宋五行志

仁宗皇祐四年。邕州有白氣出庭中。江水溢。宋史孔宗旦傳

嘉祐三年六月。邕州颶風大作。民居城外尤甚。幾無留壁。

壬午秋。水入邕城幾二丈。壞官民廨舍倉廩。是年冬邕州梅生連理。因建雙梅堂。府志

神宗元豐元年。邕州佛像動搖。初像常動。而交人入寇。又動。而州大火。其後儂智高叛復

動。於是知州錢師孟投之江中。

宋史五行志。又葉少蘊避暑錄話云。嘉祐中。邕州佛像。其手忽振動。晝夜不止。未幾交趾入寇。城幾陷。其後又動。而儂智高反。圍城卒陷

之。屠其城。熙寧元年又動。郡守錢師孟。知其不祥。亟取投之江中。遂無他異。又沈括夢溪筆談云。邕州交寇後

。城壘方完。有定水精舍泥佛。輒自動搖。晝夜不息。如此踰月。時新經兵亂。人情甚懼。有司不敢隱。具以上聞

。遂有詔令置道場禳謝。動亦不已。時劉初知邕州

。惡其惑衆。乃舁像投之江中。至今亦無他異。

八月。邕州火焚官舍千三百四十六區。諸軍衣萬餘襲。穀帛軍器百五十萬。

宋史五行志

四年六月。邕州颶風。壞城樓官私廬舍。

宋史五行志

高宗紹興五年。廣西市馬多疫死。

宋五行志

高宗紹興七年。廣西大饑。李實變爲桃。

宋史高宗本紀

孝宗淳熙十一年四月不雨。至八月。邕賓象皆旱。冬不雨。至明年二月。是年邕賓象諸州皆

旱饑。

宋史五行志

十二年。廣東西饑。全上

甯宗開禧元年。兩廣諸州旱。賑之。通鑑

(元)

成宗元貞二年七月。廣西兩江道飢。賑粟有差。

元史成宗紀

泰定帝泰定三年八月。廣西兩江飢。發粟賑之。

元史泰定帝紀

致和元年六月。南甯路水。

元史泰定帝紀

七月。廣西兩江諸州水

元史五行志

（明）

明太祖洪武四年七月。寧南府江溢。壞城垣。

明史五行志

宣宗宣德九年五月不雨。

乙卯原文夏大旱。府志

英宗天順三年。廣西旱。

明史五行志

六年兩廣饑。同上

武宗正德八年癸酉八月。郡城地震。隱隱如雷。來自西北。止於東南。叢載

十二年丁丑。春旱秋蝗。府志

世宗嘉靖七年龍見。叢載

十一年秋。郡城水泛。府志

十五年九月。火焚民居四百餘家。府志

三十年三月。飛龍見。府志。按叢載作三十一年。

三十六年冬十月。有妖傳自北方。歷江西粵東。至州境。夜入人家淫穢。或如星。或如蝠。

或如猴如犬。或爲黑氣。或見爪尾。能傷人。觸之輒流黃水而斃。比戶夜鳴金鼓執械以禦。來則聚擊之。妖即散爲星火。頃則攢爲一毬。衝簷而去。明年二月復至。鄉村騷擾如前。數月乃息。府志參叢載。

三十七年。竹生連理。府志

神宗萬曆三十九年三月。烈風暴作。雨雹如斗。城內外屋瓦殆盡。鳥獸擊死無算。歲大熟。

府志

四十六年秋。全省皆旱。南寧尤甚。明年。米騰貴。餓殍枕藉。府志

懷宗崇貞六年癸酉七月大水。入郡城。深丈餘。瀕河民舍。盡爲漂沒。府志。叢載作元年。謝通志元年六年并載。

丙戌五月地震。府志

庚寅秋。大旱民饑。府志

（清）

順治十一年十月。南甯瑞雪積數寸。明年大豐。府志下同

十五年五月地震。

康熙七年八月。城內火焚千餘家。次日城外又焚數百家。

十二年九月。倉西門外沙市。被火四次。燬數百家。

十八年正月十五日。雨雹。積寸許。

十九年十月。每值戌時。有星火見西方。光芒始練。尾指東北。一月始沒。

五十三年九月初八日。沙街火焚千餘家。

五十四年七月。大水。城市皆爲巨浸。秋收甚歉。

五十九年又大水。

雍正九年五月二十九日。南甯府慶雲現。祥光五彩。形如苞鳳。篆成山字。擁護日邊。歷卯

辰巳三時。各屬申府繪圖通報具題。

乾隆三十六年八月。霖雨旬日。河水暴漲。浸入郡城。壞民房無數。

四十二年大旱。明年米價騰貴。至五十餘錢一斤。餓殍枕籍。鬻賣子女者以萬計。

嘉慶十二年。彗星見西北。長五六丈。三月十四日。暴風大作。發屋拔樹。下雹大如斗。是

年春夏大旱。秋蝗。民饑盜劫四起。

十三年三月六日戌時。有流星大如箕。自西北馳西南。光芒如晝。聲響如雷。是年米價騰貴

。盜賊肆劫。

十三年十二月初六日。亥時地震。

十六年八月十七日。彗星見西方。白氣北指。長數丈。十月中旬始沒。

二十三年大雨。江水暴漲。浸至城門。壞民房甚多。

道光十一年。飛蝗入境。州縣官俱捕蝗。

十七年七月。連日大雨。江水暴漲。入郡城數尺。壞民房甚夥。塌城垣數十丈。及安塞門石

岸馬頭水口。

以上
府志

咸豐元年。劉墟鄉皇南山下。八尺司衙署。聞有石擲聲。時鄭傳經爲巡檢。親偵之。見紅衣

童子。運石擲上。呵之遽沒。

三年秋七月。有五色蝗害稼。并及草木。

四年大水。八尺江潦尤急。那馬墟壞屋六十餘間。明年水又漲。再壞屋四十餘間。

七年三月。彗星見於西方。

同治四年。彗星見於西南。尾長數丈。

九年大旱。民以草根木皮爲食。

光緒二年八月十二日戌時。有火星由西方飛入月宮。光華四散。聲震如雷。

光緒七年辛巳。彗星見於東北。秋八月中旬。連日東風大雨。水暴漲。築土於城門障之。故

城外水高於城內者丈餘。爲百十年來未有之災。

八年壬午七月。彗星見於東方。尾長數十丈。光明如日。至九月始滅。

十年。潭落鄉那蕨村外。地忽陷成井。水清可飲。

十八年十一月。瑞雪積數寸。明年大熟。

十九年癸巳三月初五六兩日。劉墟鄉各段。每日自晨至暮。有灰白色蝴蝶千百成羣。自北飛

來。向南而去。連翩不絕。無處無之。後聞飛至欽屬之小董某嶺。團聚而死云。

二十二年四月雨雹。大者如碗。小者如卵。傷害田禾人畜屋宇甚衆。

二十五年四月十四日方炎。那馬鄉仲谷嶺頂。忽聲如雷。將面積丈餘大石一塊。掀於狂蓬潭

東岸。穩置若釣磯。

二十八年大旱。米價每斤值制錢百文。

宣統二年。龍濟光在提督任時。每日黃昏後。卽有石自行飛擲衙門瓦面。數月乃息

又明時魏濬嶠南瑣記云

。校邕時。以左江道爲文場。道深邃。旁有亭榭園池。林木茂密。業已堵塞。予與書吏俱入居籌邊樓下。一日晚堂畢。隸入云。每薄晚有人擲瓦石入。詈之則愈甚。予視之。累累積瓦上。因詢干擲者。答云。此去外路甚遠。遂不復問。又一日。閒步出。聞閩者房內有伐樹聲。因取鑰啓視之。閩者云。有物如犬而甚大。黃色。每來則伏此處竹樹間。撼門入。亦盜食食物。逸來逐之。越牆去。尾大如帚。伐去竹樹。或可冀不來爾。蓋狐已爲妖。而人未之知也。

民國癸丑二年大水。若再漲三尺。則同光緒辛巳年矣。近年水災。以此爲大。己未八年二月二十五日申刻。北門外三官塘火藥官局。無故爆發。死十數人。該局屋宇兩進兩廊。磚瓦木石。皆飛擲數里外。無一存者。聲浪所及。全城俱震動。玻窗屋瓦。俱震破搖動有聲。

四月初五夜子刻。水面邕江妓筏火。延燒船戶甚衆。明年岸上廣西酒店娼寮。又火。延燒三元閣街民房舖戶數十間。

九年六月。那馬鄉雨雪。地皆白如鋪薄棉。

十二年八月大水。不及癸丑年二尺餘。是月四日下午八時半。有星大如碗。自南飛墜於西。聲若山崩。是時水猶未退也。

二十五年夏曆四月初十日上午九時二十五分。地震。室宇動搖。勢欲傾倒。梁柱窻蟀有聲。

戶內人皆驚惶逃避。有扑跌迷眩者。一時秩敍頗亂。俄頃即定。事後。據各縣呈報。全省同日俱動。

夏曆十月初一日。下午六時。水口街。今名臨江街失慎。焚燒舖戶二百餘間。至十二時始熄。損

失五十餘萬。爲十餘年來最大火災。幸未傷人。

水漲日記

節錄

縣人曾阮著

光緒七年辛巳八月十二日午刻。陡發東風。密雲陰雨。不見夕陽。酉正。雨漸大。淋漓徹夜

。東風不止。

十三日。自卯至酉。入夜達旦。東風大雨不休。溝澮皆盈。江水漲二尺餘。

十四日。風雨如昨。至巳正午初稍停。午後復大雨。酉初。西門外江水漲幾平岸邊。而風雨仍未止。迨夜半三四更時。水暴漲上渡船口。繼通鹽行街木行街達西門碼頭。水勢怒湧如潮。舖戶搬遷不及。油糖穀米百貨被淹者頗衆。

十五早。風雨如前。而江水已由大冲口灌入西濠。據船行報告。自十四夜至十五卯正。江水漲一丈四尺。已初。風雨稍停。天仍陰翳。午後。江水上沙街。據船行報告。本日自卯至酉。水加漲四尺六寸。是夜水入南濠。乃急將棉胎米包。及黃土等。填塞觀昔閣下出水竇口。及慶祝宮後舊燕華門處。出水竇口以禦之。然水尚能由是浸入城內。

十六日。水已沒南濠。通東濠。至北門外濠表塘。是日風停雨止。辰正。日光如常。據船行報告。自十五日至十六日午正。水加漲四尺壹寸。城內九成橋。棉花村。及北門東嶽廟前。均被水浸入深壹尺。或貳尺。

十七日天晴。卯刻。步出東門。親度水漲。計自十六日午正。至十七日卯正。水加漲三尺六寸。船行報告。江面水漲亦同。是時水不沒東門月城碼頭者三級。較道光丁酉^{十七年}七月

。記水漲所至之蹟。差弱五寸。城內東北關。水浸入深至三四尺。人民避居城垣上。擁擠如市。是時沙街之水。已封沒鞏閣之鞏矣。

十八日。天亦晴。親身出城度水。計自十七日卯正。至十八日卯正。加漲式尺七寸。勢尤洶湧。所有倉西門。鎮江門。安塞門。正南門。均以磚泥作堤。堤厚三尺餘。豫先堵塞城門口。以防水再加漲。灌入城中。並開倉平糶。翌日定米價每觔錢式十四文。

十九日。天色乍晴乍雨。親身出城度水。計自十八日卯正。至十九日卯正。水加漲式尺壹寸。舊燕華門處城垣墮低八九寸。城面中裂壹式寸。深貳三尺。長六七丈。西門街監背後大巷處。有水壹線。透過城基。湧出地面。水閘門大街溝渠內。亦有水透入浸滿。蓋明代通城溝。自鎮江門南流出。故呼鎮江門爲水閘門云。相傳水大漲時。多有水自此溝灌入城內。至府署大堂者。後乃改移水口出自觀音閣下。城中既有此現象。是日酉刻。又復大雨滂沱。至亥刻乃霽。於是通城官民徬徨憂懼。咸恐爲魚矣。

二十日。天氣清明。親身出城度水。計自十九日卯正。至二十日卯正。水加漲壹尺叁寸。西城門口之堤。水已浸至式寸有餘。北門外接龍橋路。水不沒者八九寸。幸江面水勢稍平。而各處之隙漏。亦經填塞完固。是時因昨夜大雨。水不能外洩。城內東北兩方街道。水已深至六七尺矣。

二十一日。親身出城度水。計自二十日卯正。至二十一日卯正。水加漲八寸。自卯正至午正。水加漲三寸。午後至酉正。城外水定不加漲。船行報告江面水定。亦同是時。城外環城之水面。約高於城內水面五六尺。故城外水定。而浸入城內之水。猶加漲六七寸。此刻北門街之民房。水已沒簷口以上矣。

二十二日。親身出城度水。計自二十一日酉正。至二十二日卯正。城外水退三寸。城內自昨夜至今朝。水加漲四五寸以上。自卯至酉。城外水又退九寸。合計自昨日酉正。至今日

酉正。城外水共退壹尺貳寸。是日衆將救火水櫃。在東北兩處。激水出城。道署亦派崑字福字營勇。出而助力。但激出之水。不敵浸入之水。故是日午後。城內水猶加溢三寸。

二十三日。城外水自二十二日酉刻。至二十三日酉正。退貳尺四寸。鎮署又將其署中公置之水櫃。飭練兵營。牽出。偕昨日水櫃。共同激水出城。而府縣及司馬典史各官。則分往東北兩處親自督察。又令營勇。於北城脚。自下排列而上。用桶汲水傳升。遞至堞口。傾出於外。更令居民自備水桶。挑水出東門外傾之。以工代賑。由府飭典史。在城門口。每担給銅錢六文。計自午至申。共挑出水四千五百餘担。支去錢貳十七千餘文。故是日城內水。由昨夜至今朝。加溢貳寸。自午至酉。不再加溢。然亦無減退。

二十四日。自二十三日酉正。至二十四日酉正。城外水退三尺貳寸。然水面猶高於城內水面叁尺餘。縣署雇用拮櫟五架。作之字形。向上排列。車水出城。至夜外水猶溢入城內貳寸餘。

二十五日。自二十四日酉正。至二十五日酉刻。城外水退四尺九寸。沙街已無水淹。惟東北濠之水。尙高於觀音閣下。及舊燕華門處之水竇口。故未開啓水閘。放水外出。是以城內仍有水淹。是日慶祝宮後之城堞。自堞口倒塌。至墮低三四尺。幸不傷人。

二十六日。城外北濠水已退出。團局趕早雇工開放舊燕華門處之水閘。惟因前塞之過固。故至今啓之不易。延至午後。乃得開通。於是北門內之水有去路。及夜即無矣。惟是早南濠之水面。尙高於城內。故未能貳閘同時開啟。計自二十五日酉刻。至二十六日酉刻。南濠水退六尺餘。而南濠亦將無水矣。

二十七日。城外水已退出南濠。從早雇人開該處水閘。因該竇口漕底。深八九尺。加以泥積

其上。未易沒入水中。網縛閘板鐵環。且閘板經被棉胎脹實。尤未易施工。故是日水竇未得開啟。而城內東南方之水。仍深六七尺也。幸從十九夜雨後。至今皆無風雨。故城內水雖不即退。亦無水雨之增。計自二十六日酉正。至二十七日酉正。城外已退落江千矣。

二十八日。加高工價。招人繼開水閘。福字營勇領工。尙不能開得。再懸賞有能沒入泥水中。以繩繫得閘板鐵環壹者賞錢壹千文。於是有二人領賞。環經擊得矣。惟將此閘抽起。屢抽而繩纜屢斷。以至於暮。各工人本擬晚飯後再作。無如入夜北風大起。寒氣逼人。且不能燃燈。而工遂暫停。是夜城內水浸出。退去壹寸餘。而江水已退定如常矣。

二十九早。北風稍靜。天色清明。衆即前往啓閘。斯時鋤鋤纜索。器益加增。起泥沒水。人倍盡力。迨午後。始將近城處閘板壹塊抽上。水即奔騰湧出。勢如萬馬。其在外邊閘板壹塊。因此不能抽出。然亦無妨於水之去也。蓋自二十六日至此。時經三日。上下勞瘁。而後城內始免水患。

三十日。城內之水流已盡。工人再起出閘板。並前所起者。共昇來團局。領取工價。計雇工自十七日起。至本日止。共支去錢貳百五十餘千文。其在府縣各署支出。不列此數。是災也。甚於乾隆辛卯。道光丁酉之災。可謂有清二百四十年來。未有奇災也。總計城垣城堞崩壞墮陷者。共壹十八九處。共長一百三四十丈。湮毀城內東南方民房。六七十間。北門街附近一帶民房。四十餘間。西門外沙街舖屋八九間。河邊街一帶舖屋百六七十間。南門外。下廓街。黃泥巷。古城口一帶居民。十毀其九。而鎮江門外。至安塞門外。乾隆年間建以護城之石堤。至本日亦坼裂。崩墮時。驚動附近城牆。城堞。斜坼橫

裂頽墮者八九處。每處三五七丈不等。連及城內火燒地街道。亦坼裂寸餘。長六七丈。安塞門外民居。因石堤崩墮。房戶後傾前仰者十餘家。是水退後猶有餘災也。至各鄉村田園廬墓。被水沖擊毀壞者。尤不可勝數。越至九月初六日。巡撫部院。因出巡抵郡。團局及各鄉父老。均將災情稟呈。其文有云。縱橫壹百餘里。氾濫三四十團。又云宣邑七十餘團。淹沒者已半。郡城千有餘丈。坍塌者什一。撫院批云。大水爲災。沿江一帶地方。田園廬墓。多被淹漫。寧郡首富其衡。被災自應較重。本部院目擊小民蕩析離居。深堪憫惻。已飭各地方官。於水退後。親詣查勘。分別輕重情形。應否撫恤。據實稟辦。以便奏請恩施。坍塌城垣。共若干丈。應如何修復。仰宣化縣悉心妥議。另詳核奪云云。查是水未災之前。左右兩江各埠。俱有信云。八月初旬。類皆。夜連綿大雨不止。後據太平府。及其所屬甯明州。並本郡所屬上思州。稟報道府。皆云八月初九日起。連日夜大雨不休。十三四日水漲入城。甯明尤甚。水竟沒城頂數尺。此殆十萬山之水。沿明江而下者也。是則三江漲下。加以東風上抵。此其災之所以特奇也。

以上所記。皆曾公阮親歷目覩之事。故據其水漲日記。節而錄之。

